

Transkription von Urkunde HWI 1329a

Ort, Datierung: Wismar, 1329-03-18

Signatur: Stadtarchiv Wismar, Privilegienbuch 1329

Inhalt: Albrecht II., Herzog zu Mecklenburg: Gutsverkauf an den Rat der Stadt Wismar

Jn deme namen der hilgen vnde der vnghesche=/denen dreualdicheyt amen . Wi albrecht van der / gnade godes en iunchere van Mekelenborgh , van / stargarden vnde van rostok , bekennen vnde be=/tughen openbare jn desser jeghenwordighen scrift , / dat wi mit vsemi goden willen . vmbdwugen na / willen vnde na begehelicheit na rade vnde / na vullborde vnde na hete vses leuen omes Gre=/uen henrikes van Zwerin , vser raathgheuen vser / truwen man vnde sunderliken vser vormundere / den vse leue vader . Her Henrik van meklenborgh . / deme god gnedich si . vs . vnde vse land bevol in / sime lesten . dor nuht vnde dor vromen . vses vnde / vser land , de wi vnde vse leue om . vnde vse / truwen man vnde vse vormundere , vorbenomet / dar an gheprouet hebben vnde gheseen . vsen / leuen Raadmannen . vnde der gantzen stat , vnde / der gantzen menheit to der wysmer , vorkopht / hebben redeliken vnde rechteliken . vsen hof binnen / der staad to der wysmer vor deme Mekelenborgher / dore , also he belegen is , mit alle sinen stucken de / dar to ghelegheit sin , mit deme thorne vnde mit / deme berchvrede vor dusent mark lubeker / penninghe , de vns gantzleke vnde alle vorghul=/den sin Dar to hebben vse leuen ratmanne vs / ghelaten binnen der stat to der wysmer to ere / vnde to ghemake vser , vnde vser nakomelinghe . / enen hof . de belegen is bi synte iuriens kerken / vppe deme orde in dat osten , de vsemi leuen vader / hadde to ghehort . de sylue hof de scal ewelken / liggen to alleme lybeschem rechte , also de hantues=/tinghe spreken de gheschreuen vnde ghemaket // sin . vnde vse voreldern ghe gheuen hebben , den / vorbenomeden vsen ratmannen . vnde der gantzen / stat to der wysmer , vppe den kop der borgh , vnde / ok ere anderen hantuestinghe spreken de se heb=/ben vppe de syluen rechticheyt . wer dat also , dat / wi den hof . nu vorbenomet , vor gheuen eder / vor anderen wolden . dat schole wi don eneme bor=/ghere to der wismer vnde anders nemende . / desse hantvestinghe schal nicht schaden vnde / nicht breken de hantvestinghe . de vse voreldern / den vorbenomeden vsen Raadmannen , vnde der menen stat to der wysmer ghe gheuen hebben . / Mer alle Hantuestinghe . alle vriheit vnde alle / rechticheyt , de en vore ghegheuen sin . van alle / vsen voreldern de love wi in desser scrift na hete / vnde na rade alle vser vormundere , vnde dor / vse gut . vnde dor hut vnde vromen vses menen / landes , vor vs vnde vor vsemi broder jyncherre / johanne vnde vor vsen nakomelinghen vnbre/kelik ewych to holdende . dat alle desse dingh / de hir vor bescreuen sint . gantz vnde vnbreke=/lik bliuen ewelken , so hebbe wi to ener open=/baren betoghinghe vses leuen Omes des vor=/benomeden Greuen hinrikes Jngheseghel / van zwerin mit vsemi jngheseghele ghehenget / vor desse ieghenwordighen script . desser / dingh sint toghe de dar over ghewesen hebbet / mit rade vnde mit volbort vse leuen truwen / man , vnde vse vormundere . conradt van / kremon , Jvries hasencop . herman van ortze , / bolthe hasencop . wyppert lutzowe . johan van plesse / johan van bvlowe hinrik van barnekowe . ber=/told preen , otte van dewetze , heyne mandvuel // claus van helpede , godschalk storm , henric / van plesse . eggert neghendanke , riddere , / henneke molteke en knape Desse bref is ghescre=/uen vnde ghegheuen . inder stat to der wysmer / jn deme jare na godes bort , Dusent , Drehundert , / Neghenentwinteghesten iare , an deme anderen sun=/auende in der vasten .

